

摘藻堂四庫全書薈要

集部

欽定四庫全書蒼要卷一萬八千二百七十

集部

御定全唐詩卷八百六十五

慕容垂

冢上荅太宗

太宗征遼至定州路側有一鬼衣黃衣立高冢上神彩特異遣使問

之荅以此詩言訖不見乃慕容垂墓也

我昔勝君昔君今勝我今榮華各異代何用苦追尋

釋明解

遺畫工詩

明解姓姚普光寺僧頗具才學龍朔中策第脫袈裟自云得脫此驢皮遂

置酒賦詩有一乘本非有三空何所歸之句不久病卒下夢於舊識智整及一畫工言大受苦報求寫經作功

德因遺此詩

握手不能別撫膺聊自傷痛矣時陰短悲哉泉路長松林驚野吹荒隧落寒霜言離何以贈留心內典章

巴峽鬼

夜吟

調露中有人巴峽夜泊舟聞詠詩聲甚厲激昂而悲如是通宵凡吟數十遍訪之更

無舟船但空山石泉溪谷幽絕詠詩處有人骨一具

秋逕填黃葉寒摧露草根
猿聲一叫斷客淚數重痕

河湑鬼

魏謝詩

開元六年有人泊舟於河湑者見岸邊枯骨因投食而與之俄聞空中魏謝并贈此詩

我本邯鄲士祇役死河湑不得家人哭勞君行路悲

介冑鬼

擲裴武公詩

開元末裴武公軍夜宿武公帳前見一介冑者擲一紙書而去武公取視

乃四韻詩大不悅紙隨手落為燼信知鬼物所製也出師大不利武公射中臆下病月餘薨

屢策羸驂歷亂岫叢嵐映日晝如曛長橋駕險浮天漢
危棧通岐觸岫雲却念淮陰空得計又嗟忠武不堪聞

廢興盡係前生數休街英雄勇冠軍

李叔霽

死後詩

御史李叔霽與兄仲雲俱擢第有名當代大歷初叔霽卒經歲餘其妹夫與仲

雲同寢忽夢叔霽相見依依曰我有一詩可為誦呈大兄後數年仲雲亦卒

忽作無期別沈冥恨有餘長安雖不遠無信可傳書

竇裕

洋州館夜吟

大歷中有進士竇裕家寄進海下第將之成都至洋州舍館卒嘗與

淮陰令吳興沈某善沈調補金堂至洋州舍館中夜見一白衣丈夫自門步來且吟且嗟似有

恨而不舒者久之吟詩一首沈見之甚覺類竇裕特起與語未及遂無見矣乃歎曰吾與竇君別久矣豈為鬼耶明日行未數里有殯其路前者曰進士竇裕殯宮馳還問館吏曰裕自京遊蜀至此暴亡太守命殯於館南二里外道左沈致奠拜泣而去

門依楚水岸身寄洋州館望月獨相思塵襟淚痕滿

書生

獻元載

大歷九年春元載早入朝有書生獻詩令左右收之其人若欲載讀載云候至

中書當為看又言若不能讀請自誦誦畢因不見載後竟破家身及妻子被誅

城東城西舊居處城裏飛花亂如絮海燕銜泥欲下來

屋裏無人却飛去

通幽錄亦載此事詩小異云城南路長無宿處荻花紛紛如柳絮海燕銜

泥欲作窠空屋

無人却飛去

虎丘山石壁鬼

詩二首

大歷十三年李道昌為蘇州觀察使一日郡城外虎丘山有鬼題詩二首隱於

石壁之上道昌異其事奏聞於朝准勅令致祭

道昌為文其畧云萬古丘陵化無再出君若何

人能閑詩筆桃源三月深草垂楊黃鶯百轉猿

聲斷腸聲悲怨兮淚沾巾願當生兮事明君祭

後數日再有一詩見於石後於寺山之地果有

二墳極高大荆榛藂茂詢諸耆艾竟不知何姓

氏至今

猶存

高松多悲風蕭蕭清且哀南山接幽壠幽壠空崔嵬白

日徒昭昭

一作
照照

不照長夜臺雖知生者樂魂魄安能迴

況復念所親慟哭心肝摧慟哭更何言哀哉復哀哉

神仙不可學形化空遊魂白日非我朝青松為我門雖

復隔幽顯

一作
生死

猶知念子孫何以遣悲惋萬物歸其根

寄語世上人莫厭臨芳尊莊生問枯骨三樂成虛言

祭後見石上詩

幽明雖異路平昔忝攻

一作
工

文欲知潛昧

一作
寐

處山北

兩孤墳

通幽錄云大歷初寺僧夜見二白衣人上樓竟不下尋之無所見明日有詩三首第一首幽明

雖異路云云其二處幽子示幽獨君高松多悲風云云其三幽獨君荅神仙不可學云云松陵集以幽明雖異路高松多悲風二首為幽獨君詩神仙不可學為荅詩與紀事互異

陸憑

詠浮雲

吳郡陸憑家湖州長城性悅山水未嘗寧居貞元乙丑遊永嘉歿素與吳興沈

萇友善托夢於萇贈浮雲詩一篇曰憑船已發明日午時到此如期憑喪船至詞人楊丹為之誌具旌神感銘曰篤生府君美秀而文沒而不起寄音浮雲

虛虛復空空瞬息天地中假合成此像吾亦非吾躬

韓弇

呈李續

渾瑊與西蕃會盟蕃戎背信掌書記韓弇遇害弇素與樸楊尉李續友忽夢弇

被髮披衣面目盡血相勞勉如平生以一詩呈續悲吟而別謂續曰吾久飢渴君為置酒饌錢物亦平生之分盡矣續如言祭之忽有黑風自西來旋轉筵上飄卷紙錢及酒食皆飛去時貞元四年也

我有敵國讐無人可為雪每至秦隴頭遊魂自嗚咽

尉佗

和崔侍御

貞元中有崔子向者從事南海登越王臺感其墓荒頽題詩感慨刺史徐

紳讀其詩為之修葺子向卒子煒流落南中偶
失足墜井從中行入尉佗墓室佗和其父詩贈
之寶珠以田夫人嫁之後出穴果送
夫人至蓋田橫女佗所用為殉者也

千歲荒臺隳路隅一煩太守重椒塗感君拂拭意何極
贈爾美婦與明珠

劉漑

贈竇丞

貞元中韓城令劉漑卒官家貧僑寓縣
中佛寺未半歲其縣丞竇暴死三日云

遇漑問冥途事不
語久之贈詩一首

冥路杳杳人不知不用苦說使人悲喜得逢君傳家信

後會茫茫何處期

鄭瓊羅

叙幽寃

段文昌從弟某者貞元末自信安還洛舟宿瓜洲聞有嗟歎聲是夜夢一女年

二十餘自言姓鄭名瓊羅居丹徒來揚子為市吏子王惟舉逼辱絞頸自殺無人為雪寃後此鬼相隨至洛北有樊元則者作法遣之鬼請紙筆書若雜言七字辭甚悽恨元則復令具酒脯紙錢乘昏焚於道有風旋灰直上數尺及聞悲泣聲詩凡二百餘字止載其中二十八字

痛填心兮不能語寸斷腸兮訴何處春生萬物妾不生
更恨香魂不相遇

沈青箱

過臺城感舊

元和初進士陸喬家丹陽好為歌詩一夕見一文夫自稱沈約來候

命酒邀范僕射雲及召其子青箱至青箱年可
十歲餘約指謂喬此子好為詩不率先吾逝近
從吾與僕射同過臺城
有感舊詩甚可觀也

六代舊山川興亡幾百年繁華今寂寞朝市昔諠闐夜
月琉璃水春風卵色天傷時與懷古垂淚國門前

襄陽旅殯舉人

詩

于頔鎮襄陽時選人劉某入京逢一舉人年
二十許同行意甚相得因藉草飲數杯日暮

舉人指歧逕曰某弊止從此數里能左顧乎舉人因賦此詩明年劉歸襄陽尋訪舉人惟有殯宮存焉

流水涓涓芹芻

一作吐一作發一作長芹

芽織烏西

一作雙

飛客還家

荒村無人作寒食殯宮空對棠梨花

河中鬼

踏歌

長慶中有人於河中舜城苑鸛鵲樓下見二鬼各長三丈許青衫白袴連臂踏歌

竟而沒

河水流溷溷山頭種蕎麥兩箇胡孫門底來東家阿嫂

決一百

蕭徽

題少陵別墅

徽太和中職方郎中浙西團練副使韋齊休死後屢見靈異一日呼

其家人曰蕭三郎來三郎者即徽也是日徽正死俄聞徽歎曰僕數日前至少陵別墅偶題詩一首乃是生作鬼詩因吟之

齊休曰足下此詩蓋是自識

新構茅齋野澗東
松楸交影足悲風
人間歲月如流水
何事頻行此路中

張省躬

夢張垂贈詩

省躬枝江縣令汀之子父死因住枝江有張垂者下第客死於蜀省

躬素未識太和八年省躬晝夢垂贈

詩一音驚覺遽錄其詩數日而卒

戚戚復戚戚秋堂百年色而我獨茫茫荒郊遇寒食

高山三丈夫

秋月聯句

開成中長沙梁環舉孝廉次高山館忽見三丈夫衣冠甚古自稱蕭郎中

王步兵諸葛長史取酒邀環同飲聯句詠秋月山光漸明復為聯句中郎問環舉進士乎環以舉孝廉對中郎笑曰孝廉安知為詩哉環怒叱之驚散失所在

秋月圓

如鏡

王步兵

秋風利似刀

蕭中郎

秋雲輕比絮

環秋

草細如毛

諸葛長史

天明聯句

幽一作山

樹高高影

蕭中郎

山花寂寂香

王步兵

山天遙歷歷

諸葛長史

山水急湯湯

環

鄭適

贈張珽

咸通末珽過園田過金杯玉帶枯樹三精邀至一儒流家云是二十年前死者

鄭適秀才也適命筆寫詩一首贈珽珽回顧惟見一壞冢

昔為唵風嘯月人今為唵風嘯月身冢壞路邊唵嘯罷

安知今日又勞神

甘露寺鬼

西軒詩

吳王收復浙右之明年甘露寺僧夏夜月明持課俄見數鬼自西軒出坐定命

酒南向一人衣南朝衣西向一人衣北虜衣北向一人衣縫掖衣東向一人衣朱衣清瘦多髯相顧言曰朝代雖殊古今一致時世命也知復何為各述朱衣者平生句贊賞久之虜衣者曰請各徵曩時臨危一言以代絲竹可乎衆曰可於是各賦四句吟罷晨鐘鳴候散

趙壹能為賦鄒陽解獻書可惜西江不救轍中魚

虜衣

者

偉哉橫海鱗壯矣垂天翼一日失風水翻為螻蟻食

縫掖

者衣

功遂侔昔人保退無智力既涉太行險茲路信難陟

南朝

者衣

握裏龍蛇紙上鸞逡巡千幅不將難顧雲已往羅隱毫

更有何人逞筆端

朱衣者

邵謁

降巫詩

謁讀書堂距翁源縣十餘里歿後縣民祀神巫持幘自舞忽自稱邵先輩降縣

民即曰邵先輩異時號工歌詠者能強為我賦
詩乎以為巫妄言欲苦之耳巫畧不經思即成
二十八字詞韻淒苦雖老筆不逮
鄉老中曉聲病者至為感泣咨歎

青山山下少年郎失意當時別故鄉惆悵不堪回首望
隔谿遙見舊書堂

石恪

贈雷殿直

恪西蜀人善畫亦工歌詩孟蜀亡入
汴供奉乞歸道卒後殿直雷承昊任

衡陽遇恪與同宿贈以詩別去始
悟其已死及到任公宇一如恪言

衡陽去此正三年一路程途甚坦然深邃門牆二楚外

清風池館五峰前
西邊市井來商客
東岸汀洲簇釣船
公退只應無別事
朱陵後洞看神仙

富春沙際鬼

吟

吳越時有人夜泊於富春間月
色澹然見一人於沙際吟此

陟江三十年潮打形骸朽
家人都不知何處奠杯酒

又吟

舟人問曰君是誰可
示姓名否又吟此詩

莫問我姓名向君言亦空
潮生沙骨冷魂魄悲秋風

趙畚

獻高駢

駢築羅城多發掘古冢取甌有一冢上鬼夜嘯自稱冥司趙畚獻書畧曰畚一

介遊魂

叨掌冥司希於萬雉免此一抔倘全

馬鬣之

封敢忘龍頭之庇并附一詩於後幅

我昔勝君昔君今勝我今人生一世事何用苦相侵

此詩

與慕容垂冢上荅太宗多

同以各載事蹟故兩存之

御定全唐詩卷八百六十五

謹案卷八百六十五第八頁前五行自稱蕭郎中

按下文郎中作中郎當有一訛





總校官庶吉士 臣張能照

校對官中書 臣張 頊

謄錄舉人 臣汪志伊

欽定四庫全書薈要

集部

御定全唐詩卷八百六十八

六至

詳校官原任主事 李斯咏



欽定四庫全書薈要卷一萬八千二百七十一

集部

御定全唐詩卷八百六十六

九華山白衣

吟

晉昌唐燕士隱九華山夜步林中有白衣丈夫戴紗巾貌孤俊年近五十循澗而來吟步自若將與之言未及而沒明日燕士問里人有識者曰是吳氏子舉進士善為詩卒數年矣

澗水潺潺聲不絕溪壠茫茫野花發自去自來人不知

歸時唯對空山月

河東記無名小鬼贈韋齊休詩與此正同云澗水濺濺流不絕芳草綿綿

野花發自去自來人不

知黃昏惟有青山月

御定四庫全書 御定全唐詩

田達誠借宅鬼

詩

廬陵賈人田達誠治第新城有鬼自言居龍泉舍欲修葺借達誠廳事暫住又借其後堂

為子婚樟樹神女鬼善詩達誠具酒置紙筆須臾酒盡詩成凡數十篇筆作柳體或問其姓字不言賦詩寄言衆亦不諭後歲餘辭謝去

天然與我一靈通還與人間事不同要識吾家真姓字
天地南頭一段紅

長安中鬼

秋夜吟

長安秋夜有人間鬼吟又有和者相傳務本門是鬼市或風雨晦冥皆聞其誼

聚之
聲焉

六街鼓歇行人絕
九衢茫茫室有月

吟

九衢生人何勞

勞長安土盡槐根高

和

隔窗鬼

題窗上詩

明經王紹夜深讀書有人隔窗借筆
紹借之於窗上題詩題訖寂然無聲

乃知非
人也

何人窗下讀書聲
南斗闌干北斗橫
千里思家歸不得
春風腸斷石頭城

巴陵館鬼

柱上詩

巴陵江岸古館有一廳多怪物扁鑠已十年矣山人劉方玄宿館中聞有婦人及老青衣言語俄有歌者歌訖復吟詩聲殊酸切明日啓其廳見前間東柱上有詩一首墨色甚新乃知即夜來人也復以此訪於人終不能知之

爺娘送我青楓根不記青楓幾迴落當時手刺衣上花
今日為灰不堪著

徐侃

留別安鳳

壽春人徐侃與安鳳友善相期同覓舉長安鳳先行侃以母老中止十年後侃

忽至長安仍約鳳同歸鳳辭以久漂泊恥還
故鄉各為詩贈答然侃死於家已三年矣

君寄長安久恥不還故鄉我別長安去切在慰高堂不
意與離恨泉下亦難忘

附
安鳳贈別徐侃

一自離鄉國十年在咸秦泣盡卞和血不逢一故人今
日舊友別羞此漂泊身離情吟詩處麻衣掩淚頻
別各分袂且及來年春

商山客死書生

述懷

祖詠之孫價落第後嘗遊高山夜宿空佛

寺中秋月甚明忽有一人自殿後出揖價

共坐語笑說經史云今夕偶相遇後會難期輒

賦三兩篇以述懷賦訖再三吟之夜久遂揖而

退至明日問鄰人云此前後數里并無人居但

有書生客死者葬在佛殿後南岡山上價為文

弔之

而去

家住驛北路百里無四鄰往來不相問寂寂山家春

南岡夜蕭蕭青松與白楊家人應有夢遠客已無腸

白草寒露裏亂山明月中是夕苦吟罷寒燭與君同

冢中人

續鄭郊吟

郊河北人下第遊陳蔡間過一冢上
有竹二竿青翠可愛因吟詩二句久
不能續忽聞冢中續此
郊驚問之不復言矣

冢上兩竿竹風吹常嫋嫋
下有百年人長眠不知曉

冢中
人

崇聖寺鬼

題壁

漢州崇聖寺寒食日忽有朱衣一人紫衣
一人驅殿僕馬極盛各題一絕句於壁而

去失其

所在

禁煙佳節同遊此正值醑醪夾岸香緬首

一想

十年前

往事強吟風景亂愁腸

朱衣人

策馬暫尋原上路落花芳草尚依然家亡國破一場夢

惆悵又逢寒食天

紫衣人

任彥思家鬼

血書詩

蜀昌州牧任彥思家有鬼空中奏樂索食食之無遺凡七八年一日不聞樂聲

置食無所饗廳舍楸上血書一詩彥思以刀刻之字已入木

物類易遷變我行人不見珍重任彥思相別日已遠

峽中白衣

贈馬植

截竹為筒作笛吹鳳凰池上鳳凰飛勞君更向黔南去
即是陶鈞萬類時

張仁寶

題芭蕉葉上

校書郎張仁寶素有才學年少而逝自成都歸葬閬中權殯東津寺

其家寒食日間扣門甚急出視無人唯見門上有芭蕉葉題詩端午日又聞扣門聲其父於門罅伺之見其子身長三文許足不踐地門上題五月五日天中節題未畢其父開門即失所在

寒食家家盡禁煙野棠風墜小花鈿如今空有孤魂夢

半在嘉陵半錦川

崔常侍

官坡館聯句

有中官宿官坡館燈下見有三人至皆古衣冠相謂曰崔常侍來何遲俄有一人續至悽悽然有離別之意蓋崔常侍也舉酒賦詩聯句未即崔常侍之詞也中官將起四人相顧哀嘯而去

牀頭錦衾斑復斑
架上朱衣殷復殷
空庭朗月閒復閒
夜長路遠山復山

李煜

亡後見形詩

賈魏公尹京日忽有人來展刺謁曰前江南國主李煜相見則一清

瘦道士爾自言今為師子國王偶思鍾山

而來懷中取一詩投賈讀之隨身灰滅

異國非所志煩勞殊清閒驚濤千萬里無乃見鍾山

龐德公

同鹿門少年馬紹隆冥遊詩

千年故國歲華奔一柱高臺已斷魂唯有峴亭清夜月

與君長嘯學蘇門

同望荆門

高名宋玉遺閑麗作賦蘭成絕盛才誰似遼東千歲鶴

倚天華表却歸來

憶荆南

朱均

貽常夷詩

建康常夷家近清溪一日有人齎書至稱吳郡朱秀才均相聞悉非生人

語末有一詩夷尅期書中請與相見秀才著角巾葛單衣曳履可年五十許風度閑和雅有清致自云梁朝朱异從子本州舉秀才高第屬四方多難遂無宦情陳永定末終此地問梁陳間事歷歷分明後數相往來談宴賦詩

平生遊城郭殂沒委荒榛自我辭人世不知秋與春
牛羊久來牧松栢幾成薪分絕車馬好甘隨狐兔羣何處

清風至君子幸為鄰烈烈盛名德依依佇良賓千年何
旦暮一室動人神喬木如在望通衢良易遵高門儻無
隔向與析龍津

夷陵女郎

空館夜歌

文明中竟陵劉諷投夷陵空館夜見
一女郎命青衣紫綬邀劉家六姨姨

十四舅母南鄰翹翹小娘子溢奴同歌詠
歌竟有黃衫人奉婆提王命召去因不見

明月清風良宵會同星河易翻歡娛不終綠樽翠杓為
君斟酌今夕不飲何時歡樂

楊柳楊柳媚媚隨風急西樓美人春夢長繡簾斜捲千
條入

玉戶金缸願陪君王邯鄲宮中金石絲簧衛女秦娥左
右成行紈縞繽紛翠睂紅妝王歡顧盼為王歌舞願得
君歡常無災苦

孔氏

贈夫詩三首

開元中有幽州衙將姓張者妻孔氏生五子而卒後娶妻李氏悍妬

虐遇五子日鞭笞之五子不堪其苦哭於其母墓前母忽於冢中出撫其子悲慟久之因以白

布巾題詩贈張令五子呈其父連帥上

聞勅李氏決一百流嶺南張停所職

不忿成故人掩涕每盈巾
死生今有隔相見永無因
匣裏殘妝粉留將與後人
黃泉無用處恨作冢中塵
有意懷男女無情亦任君
欲知腸斷處明月照孤墳

唐叵妻張氏

荅夫詩二首

晉昌唐叵娶姑女張氏頗有令德
開元十八年叵入洛妻卒於衛南

莊後數歲得歸追感陳迹賦詩悲吟忽見張氏
前來曰感君記念冥司特放兒來因相拜款語
下簾幃申繾綣宛如平生叵以詩贈
張氏氏亦裂帶題詩以荅天明別去

不分殊幽顯那堪異古今陰陽徒

一作
途

自隔聚散兩難

一作
難為心

蘭階兔月斜銀燭半含花自憐長夜客泉路以為家

附
唐晁悼妻詩

寢室悲長簾妝樓泣鏡臺獨悲桃李節不共夜泉開魂
兮若有感髣髴夢中來

常時華堂靜笑語度更籌恍惚人事改冥冥委荒丘陽

原歌薤露陰壑惜

一作
悼

藏舟清夜妝臺月空想畫眉愁

贈妻詩

嶧陽桐半死延津劍一沈如何宿昔內空負百年心

韋璜

贈姊

潞城縣令周混妻韋璜容色妍麗性多黠慧恒與其嫂姊期先死以幽冥事相報乾

元中卒月餘忽至其家中靈語謂家人曰本期相報故以是來後復附婢靈語又制五言詩與姊嫂夫數首

修短各有分浮華亦非真斷腸泉壤下幽憂難具陳
淒淒白楊風日暮堪愁人

贈夫二首

題云泉臺
客韋璜

不得長相守青春
天薜華舊遊
今永已泉路却為家
早知離別切人心
悔作從來恩愛深
黃泉冥冥雖長逝
白日屏帷還重尋

贈嫂

序云阿嫂
相疑留詩

赤心用盡為相知
慮後防前祇定疑
案牘可申生節目
一作桃符雖聖欲何為

臨淄縣主

與獨孤穆冥會詩

貞元中河南獨孤穆者隋將獨孤盛裔孫也客遊淮南夜

投大儀縣宿路逢青衣引至一所見門館甚肅酒食衾褥備具有二女子出見自稱隋將後裔世主齊王之女死於廣陵之變以穆隋將後裔世稟忠烈欲成冥婚召來護兒歌人同至賦詩就禮且云死時浮瘞草草囑穆改葬洛陽北坂穆於異日發地數尺果得遺骸因如言攜葬其夜縣主復見曰歲至己卯當遂相見至貞元十五年己卯穆果暴亡與之合窆

江都昔喪亂闕下多構兵豺虎恣吞噬干戈日縱橫
徒自外至半夜開重城膏血浸宮殿刀槍倚簷楹
今知從逆者迺是公與卿白刃汚黃屋邦家遂因傾
疾風知

勁草世亂識忠臣
哀哀獨孤公
臨死乃結纓
天地既板蕩
雲雷時未亨
今者二百載
幽懷猶未平
山河風月古

陵寢露煙青
君子秉

一作稟

祖德方垂忠烈名
華軒一惠

顧土室以為榮
丈夫立志操
存沒感其情
求義若可託

誰能抱幽貞

縣主贈穆

皇天昔降禍
隋室若綴旒
患難在雙闕
干戈連九州
出門皆凶豎
所向多逆謀
白日忽然暮
頽波不可收
望夷既結釁
宗社亦貽羞
溫室兵始合
宮闈血已流
憫哉吹

簫子悲啼下鳳樓
霜刃徒見逼玉笄
不可求羅襦遺侍
者粉黛成仇讎
邦國已淪覆
餘生誓不留
英英將軍祖
獨以社稷憂
丹血濺黼辰
豐肌染戈矛
今來見禾黍
盡日悲宗周
玉樹已寂寞
泉臺千萬秋
感茲一顧重
願以死節酬
幽顯儻不昧
終焉契綢繆

穆荅
縣主

平陽縣中樹久作廣陵塵
不意何郎至黃泉重見春

來家

歌人
詩

金閨久無主
羅袂坐生塵
願作吹簫伴
同為騎鳳人

穆諷

縣主
就禮

朱軒下長路青草啓孤墳猶勝陽臺上空看朝暮雲

縣主

許穆

詩

露草芊芊頽瑩未遷自我居此於今幾年與君先祖疇
昔恩波死生契濶忽此相過誰謂佳期尋當別離俟君

之北攜手同歸

縣主請
遷葬詩

伊彼維揚在天一方驅馬悠悠忽來異鄉情通幽顯獲
此相見義感疇昔言存繾綣清江桂洲可以遨遊惟子

之故不遑淹留

穆荅
縣主

王氏婦

與李章武贈荅詩

中山李章武貞元三年客遊
華州於市北街見一婦甚美

遂賃舍其家主人姓王此則其子婦也兩相悅
而私焉月餘計用直三萬餘子婦所供費亦倍
之情好彌切章武告歸贈鴛鴦綺子婦荅以玉
指環各為詩別至十一年重遊則王氏長老捨
業遠遊室無一人子婦歿已再周矣有東鄰婦
楊道其臨歿相托語云李十八郎至此乞暫留
止冀神會於髻髻中章武於是仍就其家借憩
具酒食呼祭果見王氏從室北角冉冉至迎擁
共宿敘平生懽至五更下牀嗚咽
仍各為詩敘別自屋角去不復見

鴛鴦綺知結幾千絲別後尋交頸應傷未別時

章武贈
王氏鴛

綺鴛

捻指環相思見環重相憶願君永持翫循環無終極

王氏

答李章武

白玉指環

河漢已傾斜神魂欲超越願郎更迴抱終天從此訣

王氏

贈別李

章武

分從幽顯隔豈謂有佳期寧辭重重別所歎去何之

章武

答王

氏

昔辭懷後會今別便終天新悲與舊恨千古閉窮泉

王氏

再贈

章武

後期杳無約前恨已相尋別路無行信何因得寄心

章武

再答

王氏

水不西歸月暫圓令人惆悵古城邊蕭條明早分歧路

知更相逢何歲年

章武懷念王氏

附

李助為章武賦

章武與道友隴西李助話其事助亦感而賦詩

石沈遼海濶劍別楚天長會合知無日離心滿夕陽

王麗真

與曾季衡宴會詩

太和四年監州防禦使曾孝安有孫季衡居使宅西院前

使君王有女麗真暴終於此魂現與季衡歎合近六十日少年好色不以為疑偶洩之人麗真責其負約留詩為別季衡不能詩強為一篇酬之遂絕後詢五原紉針婦云王使君女歸葬北邙山陰晦人多見其魂遊於此則女詩所云北邙空恨清秋月也

五原分袂真吳越燕拆鶯離芳草歇年少煙花處處春

北邙空恨清秋月

麗真留別

莎草青青雁欲歸玉腮珠淚灑臨歧雲鬟飄去香風盡

愁見鶯啼紅樹枝

季衡
酬別

客戶里女子

贈段何

進士段何太和八年賃居客戶里卧疾小愈有美人徑至閣中從二青衣皆絕

色說諭再三何終不應乃以紅箋題詩一篇置案上而去書迹柔媚紙末惟書一我字何自此疾日退

樂廣清羸經幾年
姹娘相托不論錢
輕盈妙質歸何處
惆悵碧樓紅玉鈿

密陀僧

湖城廳吟

太和中閩鄉主簿沈恭禮攝湖城尉
有人自稱李忠義江淮人傭於此客

死丐祈一食兼一小帽恭禮許之忠義曰此廳
人居多不安有一女子年可十七八名曰密陀
僧來叅甚不可與交言少間果有一女子來微
笑轉盼自薦恭禮不顧女吟此詩恭禮又不顧
逡巡而去在湖城每夜輒來後歸閩鄉亦
隔夜至一年餘方漸稀然終不能為患也

黃帝上天時鼎湖元在茲七十二玉女化作黃金芝

西施

謝王軒

太和中進士王軒少為詩頗有才思嘗
遊西江泊舟苧羅山下題詩於石俄見

一女子自稱西施振瑤瑤扶

石笋以詩酬謝歡會而別

妾自吳宮還越國素衣千載無人識當時心比金石堅
今日為君堅不得

附
王軒題西施石詩

嶺上千峰秀江邊細草春今逢浣紗石不見浣紗人

附
軒詩

佳人去千載溪山久寂寞野水浮白煙巖花自開落
猿鳥舊清音風月閑樓閣無語立斜陽幽情入天幕

西施詩

高花巖外曉相鮮
幽鳥雨中啼不歇
紅雲飛過大江西
從此人間怨風月

附
軒詩

當時計拙笑將軍
何事安邦賴美人
一自仙葩入吳國
從茲越國更無春

西施詩

雲霞出沒羣峰外
鷗鳥浮沈一水間
一自越兵齊振地
夢魂不到虎丘山

甄后

與蕭曠冥會詩

太和處士蕭曠善琴東遊至洛水之上見一美人自稱洛浦神

女即甄后也性好鼓琴願一聽君操曠為彈別鶴及悲風后又召龍王織綃女傳觴叙語各為

詩而別

玉筋凝腮憶魏宮朱弦

一作絲

一弄洗清風明晨追賞應

愁寂沙渚煙銷翠羽空

甄后留別蕭曠

織綃泉底少歡娛更勸蕭郎盡酒壺愁見玉琴彈別鶴

又將清淚滴真珠

織綃女詩

紅蘭吐豔間天桃自喜尋芳數已遭珠珮橋從此斷

遙天空恨碧雲高

蕭曠
答詩

沙磧女子

五原夜吟

進士趙合太和初遊五原夜卧沙磧中聞沙中女子悲吟起問之自陳姓

李家奉天城南小李村往省妙道遭党羌搆殺於此今已三年倘能歸骨必有以報合如言收骨攜至奉天訪得小李村葬之明日見此女來謝曰吾大父有演叅同契續混元經子能窮之龍虎之丹不日成矣合受之女子已没合遂究其玄微得度世

雲鬟消盡轉蓬稀埋骨窮荒

一作鄉

失

一作無

所依牧馬不

嘶沙月白孤魂空逐雁南飛

陳宮妃嬪

與顏濬冥會詩

會昌中進士顏濬下第遊廣陵同載有青衣年二十許自云姓

趙名幼芳臨別期之中元遊瓦官閣當一會神仙中人濬如言果往見美人及幼芳亦在美人言家在清溪邀濬過之則陳朝張麗華也須臾孔貴嬪亦來問幼芳乃是麗華侍兒後為隋宮御女死於江都之亂者命酒賦詩濬因留與麗華同寢達曙而別尋其處地近清溪乃陳朝宮人墓濬慘惻而返

秋草荒臺響夜蛩白楊凋

一作聲

盡減悲風綵箋曾擘欺

江總綺閣塵消

一作清

玉樹空

麗華賦

寶閣排雲稱望仙五雲高豔擁朝天清溪猶有當時月

應照瓊花綻綺筵

貴嬪賦

素一作皓魄初圓恨翠娥繁華濃豔竟如何南一作兩朝唯

有長江水依舊門前作逝波

幼芳賦

簫管清吟怨麗華秋江寒月綺窗斜慚非後主題箋

一作

詩容得見臨春閣上花

澹詩

湘中女子

驛樓誦詩

鄭僕射愚嘗遊湘中宿於驛樓夜遇女子誦詩頃刻不見

紅樹醉秋色碧溪彈夜弦佳期不可再風雨杳如年

薛濤

贈楊蘊中

進士楊蘊中得罪下成都府獄夜夢一婦人曰吾即薛濤也幽死此室因

贈此

詩

玉漏聲長燈耿耿東牆西牆時見影月明窗外子規啼
忍使孤魂愁夜永

孟蜀妃張太華

葬後見形詩

孟昶廣政初與妃張太華同遊青城山人觀太華死即葬其地數

年後道士李若冲忽見其現形因吟一詩懇若

冲超拔幽魂若冲於中元節黃籙齋會為太華

莫長生金簡生神玉章得度夢太

華復吟一詩來謝壁間有黃土書

獨卧經秋墮鬢蟬白楊風起不成眠尋思往日椒房寵

淚濕衣襟損翠鈿

謝李若冲

符吏匆匆叩夜扃便隨金簡出幽冥蒙師薦拔恩非淺

領得生神九過經

安邑坊女

幽恨詩

上都安邑坊陸氏宅人常謂為凶宅有進士臧夏猷居其中晝寢忽夢魘見一

女人綠帶紅袖弱質纖腰如霧濛花收淚而云聽妾一篇幽恨之句良久方寤

卜得上峽日秋江

一作天

風浪多巴陵一夜雨腸斷木蘭

歌

韋檢亡姬

和檢詩

檢舉進士不第有美姬捧心而卒追痛不勝舉酒吟詩一日忽夢姬言有後期

遂和前詩檢終日悒悒更夢姬曰即遂相見矣覺來神魂恍惚復題詩一首未幾果即世皆符

兆

春雨濛濛不見天
家家門外柳和煙
如今腸斷空垂淚
歡笑重追別有年

附檢悼亡姬詩

寶劍化龍歸碧落
嫦娥隨月下黃泉
一杯酒向青春晚
寂寞書窗恨獨眠

夢後自題

白浪漫漫去不迴
浮雲飛盡日西頽
始皇陵上千年樹

銀鴨金鳧也變灰

蘇檢妻

與夫同詠詩

蘇檢登第歸吳行及澄城止於縣樓上夢其妻取紅箋剪數寸題詩

檢亦裁蜀箋而賦馬詩成俱送所卧席下及卧果於席下得其詩視篋中紅箋亦有剪處歸家妻死已葬矣問其死日乃澄城所夢之日謁其塋四面多是海棠花也一作鍾輻事互異

楚水平如鏡周迴白鳥飛金陵幾多地一去不知歸

檢妻

還吳東去過

一作下

澄城樓上清風酒半醒想得到家春

已暮海棠千樹已凋零

檢

宮嬪

冥會詩

爭不逢人話此身此身長夜不知春自從國破家亡後

隴上惟添芳草新

京昭儀
寶仙

休說人間恨戀多況逢佳客此相過堂中縱有千般樂

爭及陽春一曲歌

張夫人
華國

幽谷窮花似妾身縱懷香豔吐無因多情公子能相訪

應解回風暫借春

景才人
舜英

恩情未足曉光催數朶眠花未得開却羨一雙金扼臂

得隨人世出將來

一作隨君此
去出泉臺

金車美人

與謝翱贈答詩

陳郡謝翱舉進士寓居長安昇道里庭中多植牡丹一日見有

一美人乘金車至門年可十六七風貌閑麗謂

翱曰聞此地有名花故來與君一醉耳固問為

何人曰君但知非人則已安用問耶夜闌辭歸

乞詩為贈翱悵然命筆美人答之翱明年下第

東歸至新豐逆旅步月長望追感前事賦詩朗

吟忽聞車音自西來視之乃前美人也曰將之

弘農感君意故一面耳鳴咽不自勝翱亦悲泣

誦所製詩美人復酬一詩翱別之去雖知為怪

不能忘枉道弘農留數日求之竟
絕影響還洛陽不數月以怨結卒

陽臺後會杳無期碧樹煙深玉漏遲
半夜香風滿庭月

花前空賦別離詩

一作花前竟發
楚王悲 朝

相思無路莫相思風裏花開只片時
惆悵金閨却歸去

一作處曉鶯啼斷綠楊枝

美人

一紙華箋灑

一作麗

碧雲餘香猶在墨猶新空添滿目淒

涼事不見三山縹緲人斜月照衣
今夜夢落花啼鳥去

年春紅閨更有堪愁處窗上蟲絲几

一作鏡

上塵

朝

惆悵佳期一夢中
武陵春色盡成空
欲知離別偏堪恨
只為音塵兩不通
愁態上眉凝
淺綠淚痕侵臉落
輕紅
雙輪暫與王孫駐
明日西馳又向東

美人

魏朋妻

贈朋詩

建州刺史魏朋辭滿後客居南昌素無詩思後遇病迷惑失心如有人相引接

忽索筆書詩詩意如其亡妻以贈朋也後十餘日朋卒

孤墳臨清江
每覩白日
晚松影搖長
風蟾光落
崑甸故鄉
千里餘
親戚罕相見
望望空雲山
哀哀淚如霰
恨為

泉臺客復此異鄉縣願言敦疇昔勿以棄疵賤

劉氏亡婦

題明月堂二首

蟬鬢驚秋華髮新可憐紅隙盡埃塵西山一夢何年覺
明月堂前不見人

玉鉤風急響丁東回首西山似夢中明月堂前人不到
庭前一夜老秋風

故臺城妓

詩 金陵黃進士夢過臺城故妓
自云今為吳神樂部其詩云

歌罷玉樓月舞殘金縷衣
勻鈿收迸節歛黛別重闌
網斷蛛猶織梁春燕不歸
那堪回首處江步野棠飛

金陵詞

宮中細草香紅濕宮內織腰碧窗泣
唯有虹梁春燕雛猶傍珠簾玉鈎立

無名女鬼

示宋善威

月落三株樹日映九重天
良夜歡宴罷暫別庚申年

無名鬼

詩

江上檣竿一百尺山中樓臺十二重
山僧樓上望江上指點檣竿笑殺儂

仙人未必便仙去還在人間人不知
手把白鬚從兩鹿相逢却問姓名誰

穠華

句 浚儀王氏葬其母有婿裴郎醉卧棺後家人
不知遂掩其壙酒醒見文柏為堂羣婢連臂

踏歌一婢名
穠華歌云

柏堂新成樂未央迴來迴去繞裴郎

張守中

句

薄命蘇秦頻去國多情潘岳旋興悲
今夜若棲芳草

徑為傳幽意達王孫

蝶詠

無名鬼

句

荒花半落松風晚清

御定全唐詩卷八百六十六

欽定四庫全書薈要卷一萬八千二百七十二集部

御定全唐詩卷八百六十七

渾家門客聯句

文明初毘陵滕庭俊之洛調選至榮水西投道傍莊家見二人一稱麻大

名來和一稱和且耶言同作渾家門客邀庭俊赴其館飲啖各賦詩題曰同在渾家平原門館聯句忽被主人覓喚乃知坐厠屋下傍有大蒼蠅禿掃帚而已庭俊先患熱疾自此頓愈

自與渾家鄰馨香遂滿身無心好清靜人用去灰塵

賦

終朝每去依煙火春至還歸養子孫曾向符王筆端坐

爾來求食渾家門

和且耶賦

長鬚國駙馬詠妻

大足初有士人隨新羅使泛海風吹至一處人皆長鬚號長鬚國其

王拜士人為駙馬主甚美而有鬚嬪姬亦然士

人每見之不悅因賦此詩王大笑曰駙馬竟未

能忘情於小女頤頤間乎忽一日其君臣憂戚

士人怪問之王泣曰吾國有難非駙馬不能救

士人驚曰苟難可弭性命不敢辭也王乃令具

舟命使隨往謂曰煩駙馬一謁海龍王但言東

海第三汊第七島長鬚國有難求救我國絕微

須再三言之因涕泣執手而別士人登舟瞬息

至岸乃前求謁龍王王降階迎訪其來意士人

具說龍王即命速勘良久一人入白境內竝無

此國士人復哀訴龍王更敕使者細尋勘食頃

使者返曰此島蝦合供大王此月食料前日已

追到龍王笑曰客固為蝦所魅耳吾雖為王所
食皆稟天符今為客減食乃令引客視之見鐵
鑊數十如屋滿中是蝦有五六頭色赤大如臂
見客跳躍似求救狀引者曰此蝦王也士人不
覺悲泣龍王命赦蝦王一鑊令使送客
歸中國二夕至登州顧二使乃巨龍也

花無葉不妍女無鬚亦醜丈人試遣惣無未必不如惣

有

原陵老翁吟

神龍中廬江何讓之赴洛見原陵盤石

上坐一翁眉鬢皓然著寬幪巾襦袴幘

烏紗抱膝南望吟詩讓之已訝其非人翁忽又

吟讓之處欲前執翁倏然躍入丘中讓之從焉

翁已復本形為一狐跳出讓之見几案上有一
帖文書題云應天狐超異科策懷之躍出後數

日有僧備三百緘購贖讓之納緘仍不與書帖
經月餘其弟至問讓之取書帖去即化為一狐
未幾有敕捕內庫被人盜貢絹三百疋尋
蹤及讓之獲其緘讓之不能雪卒斃枯木

野田荆棘春閨閣綺羅新出沒頭上日生死眼前人欲
知我家在何處北邙松柏正為鄰

洛陽女兒羅綺多無奈孤翁老去何奈爾何

正色鴻燾神思化伐穹施后承光負玄設嘔淪吐萌根
倪散截迷腸郝曲霽音零霾曠入雀燉龜水健馳御屈

拿尾研動袿袿啗啗溜用祕功以嶺以穴拖薪伐藥莽

櫟萬茁嘔律則祥佛倫惟薩牡虛無有頤咽藥屑肇素

未來晦明興滅

一 狐書

五行七曜成此閏餘上帝降靈歲且湑徐蛇蛻其皮吾
亦神攄九九六六束身天除何以充喉吐納太虛何以
蔽蹠霞袂雲初哀爾浮生櫛比荒墟吾復麗氣還形之
初在帝左右道濟忽諸

二 狐書

嚴舍質詩

景雲初蕭志忠刺晉州將以臘日畋遊先
一日有採薪者暴瘡不能歸因止巖穴之

下夜將艾似有人聲伏而窺之有一人身長丈
餘向谷長嘯俄而羣獸俱至長人宣言曰余玄

冥使者奉北帝命明日蕭使君當順時畋獵爾等若干合死於箭死於鎗死於網罟鷹犬言訖有虎與麋皆屈膝求救長人曰余聞東谷巖四兄善謀爾等可就彼祈求羣獸皆喜使者東行羣獸畢從時樵者疾少間隨往覘之見茅屋中懸一虎皮有黃冠者名含質即嚴四兄也驚起見使者曰濶別已久得非配羣生獵日刑名而至此乎使者曰然然彼求救於四兄四兄當為謀之虎麋狐兔即屈膝哀請嚴曰蕭使君每役人必恤其飢寒若祈膝六降雪巽二起風則不復獵矣又對使者云向在仙都豈意千年為獸身悒悒不樂因述懷一章又云我譴謫已滿行歸紫府題數行於壁使後人知僕曾居此也

昔為仙子今為虎流落陰崖足風雨更將斑毳被余身

千載空山萬般苦

述懷

下玄八千億甲子丹飛先生嚴舍質謫下中天被斑草
六千甲子血食澗飲廁猿狖下濁界景雲元紀升太一

題壁

李儼詩

儼宗室子家於號畧博學善屬文天寶十五
載登進士第後於汝墳逆旅被狂疾夜走出
變為虎同年李儼以監察御史使嶺南至商於
界虎突出欲擒食之忽作人言曰幾傷我故人
儼聆其音似儼遂與之言因具述變化之由託
其賑恤妻子口誦文二十篇令其傳世復為詩
云

偶因狂疾成殊類災患相仍不可逃今日爪牙誰敢敵
當時聲跡共相高我為異物蓬茅下君已乘輶氣勢豪
此夕溪山對明月不成長嘯但成嗥

維揚空莊四怪聯句

寶應中維揚元無有行郊野夜
值風雨大至時兵荒後人戶多

逃入一空莊避之雨止月出見四人衣冠各異
吟詩遞相褒賞及明尋堂中惟有故杵燈臺水
桶破鐺乃知四
人即此物也

齊紈魯縞如霜雪寥亮高聲予所發

故杵

嘉賓良會清夜時煌煌燈燭我能持

燈臺

清冷之泉候朝汲桑綆相牽常出入

水桶

爨薪貯泉相煎熬充他口腹我為勞

破鑊

柳藏經二絕句

建中間東都薛弘機隱渭河之隈有客造門自云姓柳名藏經歌一詩與

弘機談論經典而別明年又來復歌一絕情意搔然竟失其踪是夜惡風發屋一枯柳拉折其

內不知誰人藏經

百餘卷盡爛壞

寒水停園沼秋池滿敗荷杜門窮典籍所得事今多

誰謂三才貴余觀萬化同心虛嫌蠹食年老怯狂風

太白山魔誑道士詩

貞元中韋自東以壯勇聞有道士煉丹於太白山石洞中數有

妖魔入洞擊散藥壚邀自東仗劍相護有巨虺
及美女至自東竝以劍擊退後有道士駕鶴而
來勞自東曰妖魔已盡吾弟子丹將成矣有詩
志喜自東釋劍禮之俄而突入藥壚爆裂無遺

三秋稽顙叩真靈龍虎交時金液成絳雪既凝身可度

蓬壺頂上彩

一作有

雲生

金缶魅詩

河東李員居長安延壽里元和初室西隅有聲若韻金石俄有歌者音清越久不已

凡數夕聞焉後至秋始六日夜雨墮堂北垣明日得一缶僅尺餘制用金形狀奇古蓋千百年之器

色分藍葉青聲比磬中鳴七月初七夜吾當示汝形

東陽夜怪詩

元和中彭城秀才成自虛就舉東還路出東陳驛風雪夜投佛寺暗中有一老

病僧俄復有數人至以自虛舉子各述所作詩喧論達曉自虛方欲自誇舊製一無覩矣及追尋始知病僧自稱安智高者是病橐駝稱前河陰轉運巡官盧倚馬是驢稱桃林客輕車將軍朱中正是牛敬去文是狗奚銑金是雞苗介立是猫胃藏瓠是一刺蝟藏瓠下者

誰家掃雪滿庭前萬壑千峰在一拳吾心不覺侵衣冷

曾向此中居幾年

安智高詠聚雪為山

擁褐藏名無定蹤流沙千里度衰容傳得南宗心地後

此身應便老雙峰

安智高病中自述二首

為有閭浮珍重因遠離西國赴咸秦自從無力休行道
且作頭陀不繫身

長安城東洛陽道車輪不息塵浩浩爭利貪前競著鞭

相逢盡是塵中老

盧倚馬寄
同侶二首

日晚長川不計程離羣獨步不能鳴賴有青青河畔草

春來猶得慰

一作
餽

羈

一作
飢

情

愛此飄飄六出公輕瓊冷絮舞長空當時正逐秦丞相

騰躑川原喜北風

敬去文詠雪獻曹州房
州房難僕呼雪為公余以古人呼竹
去文云曹

為君證之曹州
房莫知所對

事君同樂義同憂
那校糟糠滿志休
不是守株空待兔

終當逐鹿出林丘

敬去文言
志二首

少年長負飢鷹用
內顧曾無寵鶴心
秋草驅除思去宇

平原毛血興從禽

舞鏡爭鸞綵臨場
定鶻拳正思仙仗
日翹首仰一作樓

前奚銑金近
作三首

養鬪形如木迎春
質似泥信如風雨
在何憚跡卑棲

為脫田文難常懷紀消恩欲知踈野態霜曉叫荒村

亂魯負虛名遊秦感甯生候驚丞相喘用識葛盧鳴黍

稷滋農具軒車之道情近來筋力退一志在歸耕

朱中正詩

為慙食肉主恩深日晏蟠蜿卧錦衾且學志人知白黑

那將好爵動吾心

苗介立詩

鳥鼠是家川周王昔獵賢一從離子卯

鼠兔皆變為蝟也

應見

海桑田

胃藏瓠題
舊業詩

田四郎求婚聯句

元和十三年江陵編戶成叔并有女興娘年十七忽有人自稱田四

郎階媒氏求婚叔弁不許四郎笑一聲有二人
自空下曰安有不可媒氏請為聯句定婚聯句
訖媒與三人大絕倒不復見
其女初若醉人去後亦醒

一點紅裳出翠微
秋天雲靜月離離

田四郎

天曹使者徒

回首何不從他九族卑

田請叔弁繼作叔弁不知詩
回辭聞堂上有人教其云云

黑駒別盧傳素詩

嶺南從事盧傳素寓居江陵元和
中有一黑駒乘之甚勞苦然未嘗

有銜槩之失願愛之一旦忽人語曰阿馬是丈
人表甥賀蘭家通兒也丈人使通兒賣一別墅
得錢一百貫通兒破用此錢今作畜生在槽檻
五六年與丈人償債畜生壽已盡當死請速將
阿馬貨賣兼有一篇
留別乃驥首朗吟云

既食丈人粟又飽丈人芻今日相償了永離三惡途

筆精詩

元和中博陵崔穀寓長安延福里見人長不盡尺自北垣下升榻請寄硯席袖出三詩投

於穀趨北垣下沒穀乃發

其處得一管筆鋒銳尚新

昔荷蒙恬惠尋遭仲叔投夫君不指使何處覓銀鉤

學問從君有詩書自我傳須知王逸少名價動千年

能令音信通千里解致龍蛇運八行惆悵江生不相賞

應緣自負好文章

二斑與甯茵賦詩

大中年秀才甯茵寓南山莊夜有人一稱桃林斑特處士一稱南山

斑寅將軍來訪談論賦詩而別及視其跡乃知牛與虎也

曉讀雲水靜夜吟山月高馬能履虎尾豈用學牛刀

茵 寗

賦

但得居林嘯馬能當路躡渡河何所適終是怯劉琨

寅 斑

賦

無非悲寗戚終是怯庖丁若遇龔為守蹄涔向北溟

特 斑

賦

白田獺魅別村女詩

楚州白田村民沈某女患魅腹漸大若妊令巫設壇召魅自陳

淮中老獺願自此屏迹但痛腹中子未有若生而不殺以還我是望外也言畢嗚咽遂作別詩須臾患者釋然後旬月產獺子三頭送湖中有巨獺負而沒之

潮來逐潮上潮落在空灘有來終有去情易復情難腸斷腸中子明月秋江寒

邢君才舊宅三怪詩

太原掌書記姚康成奉使汧隴假邢君才舊宅休息二更後月

色如練廊房內聞飲樂之聲曰今三人可各賦一篇取樂康成推門求之則皆失矣尋其處見有鐵銚子一柄破笛一管一禿黍穰帚而已康成不欲傷之遂各埋於他處

昔日炎炎徒自知今無烽竈欲何為可憐國柄全無用

曾見家人下第時

鐵鉞

當時得意氣填心一曲君前直萬金今日不如庭下竹

風來猶得學龍吟

破笛

頭焦鬢禿但心存力盡塵埃不復論莫笑今來同腐草

曾經終日掃朱門

禿帚

維揚少年與孟氏贈荅詩

維揚萬貞娶壽春坊孟氏為妻美容質有詞藻貞商

於外孟氏遊家園獨吟而泣有少年貌甚秀麗踰垣求偶孟氏許而賦詩少年亦以詩荅之遂私焉同處踰年而夫自外至孟氏憂且泣少年曰勿爾吾固知其不久也忽騰身而沒竟不知

為何
怪

可惜春時節依然獨自遊無端兩行淚長祇對花流

孟氏

遊家
園作

誰家少年兒心中暗自欺不道終不可可即恐郎知

孟氏

贈荅

少年

神女得張碩文君遇長卿逢時兩相得聊足慰多情

少年

荅孟

氏

胡志忠題戶

處州小將胡志忠奉使之越夜止山館之東序進膳之次有異物其狀甚偉當

盤而立志忠擊之連有傷痛聲如犬語甚分明
曰請止請止若不止知誰死志忠運臂愈疾異
物又疾呼曰斑兒何在續有一物自屏外來志
忠又擊之力不勝僕夫曳之入東閣顛仆之聲
如壞牆然未久志忠儼然而出復命膳卒無一
言明日行封署其門屬館吏勿啓旬餘乃還止
於館索筆硯泣題其戶題訖以筆擲地而失所
在啟其戶志忠與斑黑二犬俱仆於西北隅矣
恃勇禍必嬰恃強勢必傾胡為萬金子而與惡物爭休
將逝魄趨府庭止於此館歸冥冥

高侍郎詩

草場官張立本有女為物所魅自稱高侍郎吟詩一首宅後有高偕侍郎墓野狐窟

穴其中蓋

狐妖也

危冠高袖楚宮妝，獨步閑庭逐夜涼。
自把玉簪敲砌竹，清歌一曲月如霜。

呂氏宅妖誓師詞

汝南岑順旅陝州，居外族呂氏山宅，見壁下天那軍與全家軍各出

兵會戰，有軍師致辭，鼓之會戰，數日勝負不常，順為鬼氣所中，顛顛頓頓，甚因掘其下，得古墓，明器有甲冑數百，戲局列馬，滿秤乃悟軍師之詞，乃象戲行馬之勢也。

天馬斜飛度三止，上將橫行擊四方。
輜車直入無迴翔，六甲次第不乖行。

袁少年詩

援

風波千里閣臺榭半天高此興將何比身知插羽毛

君賦

山

峰巒多秀色松桂足清聲自有山林趣全忘城闕情

南賦

嶽廟

羅浮南海外昔日已聞之千里來游覽幽情我自知

東柯院妖詭杜令

隴城縣有東柯僧院甚有幽致遊人如市忽一日有妖異起空中擲

下瓦礫扇揚灰塵人莫敢正立院僧召道士誦

咒衣褱帶解狼狽而竄縣令杜延範自往觀之

曰安有此事妖於空中擲小書帖

多成絕句凌詭杜令覺之亦遽還

雖共蒿蘭伍南朝有宗祖莫打綠袍人空中且歌舞

堪憐木邊士非兒不似女瘦馬上高山登臨何自苦

嵩山小兒吟

嵩山內有老僧結茅以居忽見一小兒
參禮求為弟子僧乃問曰此處人迹甚

稀汝因何至此又因何求為弟子曰父母俱喪
身無所依願離塵俗欲修來世福業也僧曰志
願雖嘉能從道心惟一乎小兒曰若心與言違
皇天后土自不容耳見其敏悟遂與落髮精進
勤劬罕有倫等居數年時值深秋忽慨然朗吟
長嘯良久有一羣鹿過小兒躍然脫却僧衣化
為鹿而去

我本長生深山內更何入他不二門爭如訪取舊時伴

休更朝夕勞神魂

魚腹丹書

吳郡漁人張胡子嘗於太湖中釣得一巨魚腹上有丹書字

九登龍門山三飲太湖水畢竟不成龍命負張胡子

魚身字

金州洵陽縣水南鄉百姓柏君懷於漢江勒漠潭探得魚長數尺身上有字

三度過海兩度上漢行至勒漠命屬栢君

馬作人語

路巖自成都移鎮渚官所乘馬忽作人語不久及禍

蘆荻花此花開後路無家

孫長史女與焦封贈荅詩

開元初浚儀令焦封罷任喪妻客蜀中夜逢一青衣

邀入一甲第有女子年十七八儀貌殊常自稱
孫長史女夫喪寡居於此命酒賦詩遂留匹偶
經月封思入關女贈玉環并詩為別封亦以詩
留贈登前途女忽奔至疑訝間有千餘猩猩來
女喜躍曰君不顧我東歸我亦
逐女伴歸山耳化為一猩猩去

妾失鴛鴦伴君方萍梗遊少年懽醉後只恐苦相留

贈封

心常名宦外終不恥狂遊誤入桃源裏仙家爭肯留

酬封

鵲橋織女會也是不多時今日送君處羞言連理枝

別封

但保同心結無勞織錦詩蘇秦求富貴自有一回時

封留

別

石甕寺鐙魁詩

進士楊稹家於渭橋肄業昭應石甕寺有紅裳女子既夕而至容色姝麗

徐步簾外而歌稹納之自稱開元中明皇與楊妃建此寺封我為西明夫人乃西偏經幢中鐙精也晨去暮還不止家人潛伏佛榻窺之撲滅鐙遂絕

涼風暮起驪山空
長生殿鏢霜葉紅
朝來試入華清宮
分明憶得開元中

金殿不勝秋月斜
石樓冷誰是相顧人
褰帷弔孤影

煙滅石樓空悠悠
永夜中虛心怯
秋雨豔質畏飄風
向壁殘花砌侵堦
墜葉紅還如失
羣鶴飲恨在雕籠

前二首紅

裳女子歌此首風雨
夜一嬰兒為紅裳歌

洛下女郎歌

天寶中洛下崔玄微夜見諸女郎李氏陶氏楊氏衣服顏色各異自言俱佳苑中邀封家十八姨命席各歌以送酒仍言苑中多被惡風乞玄微立朱幡圖日月五星文於苑東免諸侶之患女郎乃衆花之精封十八姨者風神也

皎潔玉顏勝白雪況乃當年對風月沈吟不敢怨春風

自歎容華暗消歇

紅裳人

絳衣披拂露盈盈淡染胭脂一朶輕自恨紅顏留不住

莫怨春風道薄情

白衣人

袁長官女詩

廣德中秀才孫恪於洛中魏王池畔見一大第有女子摘庭中萱草吟詩詰之

是袁長官女少孤求適人未售恪覩其光容豔麗遣媒納為室袁金繒贍足治家甚嚴生二子後恪任幕職挈過端州袁云此去峽山寺我家舊有門徒居之欲赴彼設齋恪如言抵寺齋罷有野獼數十連臂下生臺悲嘯袁題詩僧壁撫二子咽泣數聲裂衣化為老獼偕去詢老僧乃知此獼寺中所養開元中高力士經過憐其慧黠攜獻上陽宮者

彼見是忘憂此看同腐草青山與白雲方展我懷抱

萱摘

草吟

剛被恩情役此心無端變化幾湮沈不如逐伴歸山去

長笑一聲煙霧深

題峽山
僧壁

真符女與申屠澄贈和詩

貞元中什邡尉申屠澄赴官至真符縣東村路傍茅

舍中有老父及嫗一女年十四五態甚閑麗因與之訂婚後生一男一女澄嘗作贈內詩其妻有和然未嘗出口秩滿將歸秦妻始以詩語澄悵然若有慕者澄曰儻憶賢尊今則至矣何用悲乎及過妻家草舍不復有人於故衣中見一虎皮妻大笑曰此物尚在耶披之即變為虎哮吼而去澄驚走避之攜二子望林大哭竟不知所往

一尉慙梅福三年媿孟光此情何所喻川上有鴛鴦

澄贈

琴瑟情雖重山林志自深常憂時節變辜負百年心

和女

天桃詩

太和中處士姚坤居東洛萬安山有女子自稱天桃詣坤云是富家女誤為年少誘出失

蹤不可復還願持箕帚坤納之妖麗冶容至於篇什俱能精至後坤應制挈入京至盤豆館天桃不樂取筆題竹簡為詩一首吟諷久之忽有曹牧獻良犬入館犬見天桃怒目掣鑿上階天桃亦化為狐跳上犬背抉其目行數里犬斃狐即不知所之

鉛華久御向人間欲捨鉛華更慘顏縱有青丘吟夜月無因重照舊雲鬟

青衣春條詩

南陽張不疑開成間宏詞登科授秘書寓京國市一青衣於胡司馬名春條指

使無不愜適兼好學善書錄潛為小詩往往於戶牖間題之居兩月餘有昊天觀尊師知其妖

作法撰水復本形乃是一朽明器背上題曰
春條劈腰頸間有血不疑得疾沈錮二年死

幽室鎖妖豔無人蘭蕙芳春風三十載不盡羅衣香

明器婢詩

開成中洛下學究盧涵赴山莊路遇雙鬟甚有媚態云是耿將軍守瑩青衣邀涵飲

為詩送酒涵惡詞之不稱窺其室見取蛇血變酒驚走避歸率家人搜尋於柏林中得一大明

器婢好有蛇

斃於其傍

獨持巾櫛掩玄關小帳無人燭影殘昔日羅衣今化盡
白楊風起隴頭寒

妙香詞

唐鄭繼超過田參軍贈妓曰妙香數年告別歌北邙月詞送酒翌日同至北邙山下化狐

而去田君

亦狐也

勸君酒莫辭花落拋舊枝只有北邙山下月清光到死也相隨

廬山女贈朱朴

鯉魚

但持冰潔心不識風霜冷任是懷禮容無人顧形影
知君久積池塘夢遣我方思變動來操報若同顏叔子
今宵寧免淚盈顙

青蘿帳女贈穆郎

榕樹

團圓今夕色光輝結了同心翠帶垂此後莫教塵點染
他年長照歲寒姿

褰帳

揉藍綠色麴塵開靜見三星入坐來桂影已圓攀折後
子孫長作棟梁材

題碧花牋

珠露素中書繾綣青蘿帳裏寄鴛鴦自憐孤影清秋夕
灑淚裴回滴冷光

白蘋洲碧衣女子吟

張確嘗遊雲上白蘋洲見二碧衣女子攜手吟此確逐之化為

翡翠

飛去

碧水色堪染白蓮香正濃分飛俱有恨此別幾時逢藕
隱玲瓏玉花藏縹緲容何當假雙翼聲影暫相從

新林驛女吟示歐陽訓

生飛蟲

月明階悄悄影焦腰身小誰是騫翔人願為比翼鳥

擊盤歌送歐陽訓酒

飛燕身輕未是輕枉將弱質在巖扃今來不得同鴛枕

相伴神魂入杳冥

白衣女子木葉上詩

冥賞嘗遇一衣白衣女子候不見後於林杪見白獼猴擲一木葉

陸其前上書

二十字云

桃花洞口開香藥落莓苔佳景雖堪翫蕭郎殊未來

席上歌

有少年於巖下逢女子留與同居十日於席上作歌贈少年云

洞府深沈春日長山花無主自芬芳凭闌寂寂看明月
欲種桃花待阮郎

鳳凰臺怪和歌四首

大歷中有士人獨行鳳凰臺見一男子與婦人相和而歌追而

觀之乃二獸也一類
豕而高一類龍而小

深閨閒鎖難成夢那得同衾共繡牀一自與郎江上別
霜天更自覺宵長

愁聽黃鶯喚友聲空閨曙色夢初成窗間總有花牋紙
難寄妾心字字明

寂靜璇閨度歲年竝頭蓮葉又如錢愁人獨處那堪此
安得君來共枕眠

卧病匡牀香屢添夜深猶有一絲煙懷君無計能成夢

更恨砧聲到枕邊

御定全唐詩卷八百六十七

欽定四庫全書薈要卷一萬八千二百七十三

集部

御定全唐詩卷八百六十八

肅宗

夢丹書

肅宗初為皇太子天寶十三載觀安祿山有悖逆之狀恐危宗廟遂精誠祈夢

其夜夢故內侍普寂等二人舁一案覆以黃帕自天而下直至帝前素版丹書文字甚多既寤所記者惟四句

厥不云乎惟其惟時上天所保福祿不虧

代宗

夢黃衣童子歌

廣德元年吐蕃入寇代宗幸陝及回駕至潼關夜夢黃衣童子

歌云云詰旦上言其夢侍臣賀曰此土德當王吐蕃破滅之兆也

中五之德方峨峨胡胡呼何奈何

劉禹錫

夢揚州樂妓和詩

禹錫於揚州杜鴻漸席上見二樂妓侑觴醉吟一絕後二

年之京宿邸中二妓

和前詩執板歌云

花作嬋娟玉作妝風流爭似舊徐娘夜深曲曲灣灣月

萬里隨君一寸腸

邢鳳

夢中美人歌

涇原節度李彙說貞元中有帥家子邢鳳居長安平康里南質一大

第即其寢而晝偃夢一美人古裝高鬟長眉執卷而吟鳳發其卷美人曰君必欲傳之無過一篇取綵箋傳其春陽曲問曲中弓彎何謂美人云父母教妾為此舞乃起整衣張袖舞數拍為弓彎狀以示鳳既罷辭去鳳覺仍於襟袖得其詞

長安少女

一作兒女

踏

一作說

春陽

一作忙

何處春陽

一作歸

不斷

腸舞袖弓彎

一作腰

渾忘却羅衣空換

一作羅幃空度一作蛾眉空帶

九

秋霜

石季武

夢中詩

涼武公愬數年攻戰建殊勳以仁恕為先未嘗枉殺一人長慶元年自魏博徵還將入洛其衙門將石季武先在洛夢公自北登天津橋季武為導有道士八人持絳節幡幢從南欲上導騎呵之對曰我迎仙公可記我言聞於相公因吟詩云云後三日涼公果自北登天津橋季武為導入

愬天宮寺月餘薨

聳轡排金闕乘軒上漢槎浮名何足戀高舉入煙霞

王炎

葬西施挽歌

元和初太原王炎夢遊吳聞吳王宮中出輦吹簫擊鼓言葬西施

詔詞客作挽歌矣

進詩王甚嘉之

西望吳王國雲書鳳字牌連江起珠帳擇地

一作土

葬金

釵滿

一作鋪

地紅心草三層碧玉階春風無處所悽恨不

勝懷

沈亞之

秦夢詩三首

太和初亞之客索泉邸舍夢入秦見穆公尚始平公主弄玉所居宮

曰翠微宮公主芳姝明媚筆不可模畫每吹簫聲調遠逸悲人聞者莫不自廢約一年公主卒葬咸陽原公命亞之作挽歌并墓銘後公辭亞之令歸又為歌一章仍至翠微宮與公主侍人

泣別有題宮門詩已而公命車駕送出函谷關為別語未卒驚覺索泉秦穆公葬地也

泣葬一枝紅生同死不同金鈿墜芳草香繡滿春風舊

日聞簫處高樓當月中梨花寒食夜深閉翠微宮

挽公主

擊鼙舞恨滿煙光無處所淚如雨欲擬著辭不成語金鳳銜紅舊繡衣幾度宮中同看舞人間春日正歡樂日

暮東風何處去

別穆公

君王多感放東歸從此秦宮不復期春景似傷秦喪主

落花如雨淚燕脂

題宮門 以上
三首又見本集

盧獻卿

夢中詩

獻卿范陽人嘗作愍征賦時人以為庾子山哀江南之亞大中時連年不中第

游衡湘

至郴夢人贈詩旬日歿郴守

塋之近郊果以夏初皆符所夢者

卜築郊原古青山無四鄰扶疎遠屋樹寂寞獨歸人

劉景復

夢為吳泰伯作勝兒歌

吳郡泰伯祠市人賽祭多繪美女以獻歲乙丑

有以輕綃畫侍婢捧胡琴者名為勝兒貌踰舊繪巫方獻舞進士劉景復過吳適置酒廟東通波館忽欠仲思寢夢紫衣冠者言讓王奉屈隨至廟揖而坐王語之曰適納一胡琴妓藝精而

色麗知吾子善歌奉邀作胡琴一曲以寵之因
命酒為作歌王召勝兒授之劉寤傳其歌吳中
云

繁弦已停雜吹歇勝兒調弄邏娑撥四弦攏撚三五

一作

四聲喚起邊風駐明月大聲嘈嘈奔湜湜浪颯波翻倒

溟渤小弦切切怨颼颼鬼哭神悲秋

一作
任

窸窣倒腕斜

挑掣流電春雷直戛騰秋鶻漢妃徒得端正名秦女虛
誇有仙骨我聞天寶十年前涼州未作西戎窟麻衣右
衽皆漢民不省胡塵暫蓬勃太平之末狂胡亂犬豕崩

騰恣唐宓玄宗未到萬里橋東洛西京一時沒漢土民

皆

一作一朝漢民

沒為虜飲恨吞聲空嗚咽時看漢月望漢天

一作民

怨氣衝星成彗宇國門之西八九鎮高城深壘閉

閑卒河湟咫尺不能收輓粟推車徒兀兀今朝聞奏涼
州曲使我心神暗超忽勝兒若向邊塞彈征人淚血應
闌干

郭仁表

夢中辭

偽吳春坊吏郭仁表居治城北甲寅歲
得疾沈痼夢道士衣金花紫帔入坐堂

上仁表初不甚敬因問疾何時可愈道士色厲曰甚則有之既寤疾甚復夢前道士至因叩頭遜謝道士色解索紙筆書授之因爾疾愈

飄風暴雨可思惟鶴望巢門斂翅飛吾道之宗正可依萬物之先數在茲不能行此欲何為

國邵南

夢崔嘏妻詩

崔嘏娶曹州刺史李續女李令兵馬使國邵南勾當障車後邵南夢

在一廳中女立床西嘏在床東女執箋題詩一首授嘏嘏朗吟之夢後纔一歲崔妻卒

莫以真留妾從他理管弦容華難久駐知得幾年

盧絳

夢白衣婦人歌詞

絳後主末年為宣州節度宋平金陵絳殺歙州刺史龔慎

儀謀奔嶺表不得復降宋慎儀臣穎愬之朝坐斬初絳未遇時病瘖且死夢白衣婦人頗有姿色歌菩薩蠻勸絳酒曰妾玉真也他日富貴相見於固子坡至是臨刑有婦人姓耿名玉真者坐淫亂與同斬衣服姿貌宛如前夢其行刑地即固子坡也

是詩行刑地名

南唐野史翰府名談云所夢者

孟家坡今並載

玉京人去秋蕭索
畫簷鵲起梧桐落
欹枕悄無言
月殘夢圓背燈惟暗泣
甚處砧聲急
眉黛小山攢芭蕉生

暮寒

清風明月夜深時
箕箒盧郎恨已遲
他日孟家坡上約
再來相見是佳期

張生

夢舜撫琴歌

進士張生下第遊蒲關宿於舜廟夢舜撫琴歌曰

南風薰薰兮草芊芊
妙有之音兮歸清弦
蕩蕩之教兮由自然
熙熙之化兮吾道全
薰薰兮思何傳

漳郡守

夢康仙示詩

康仙乾符間賣藥衢市居員山琵琶坂人為立廟郡守欲移之山椒

夢示以詩廟遂不復移焉

賣藥因循未得還却因耽酒到人間有心只戀琵琶坂

無意更登山上山

獨孤遐叔妻白氏

夢中歌

貞元中遐叔遊劍南歸至會光門外天已暝路隅有佛堂止焉至夜分忽聞有

公子女郎十數輩攜酒具賞會中有一女郎憂傷憔悴乃其妻白氏也少年舉杯強之歌轉面

揮涕遐叔驚憤捫一磚飛擊悄然一無所有遐叔謂其妻死矣至其居妻夢魘方寤說夢中與

遐叔所

見並同

今夕何夕存耶沒耶良人去今天之涯園樹傷心兮三

見花

張生妻

夢中歌

張生家汴州中牟縣赤城坂別妻遊河朔五年而還汴出鄭州門已昏黑忽於

草莽中見燈火熒煌有長鬚者白面年少者紫衣者及黑衣胡人綠衣少年挾其妻宴飲張捫得一瓦擊之中長鬚頭再發一瓦中妻額忽聞然無所見張君謂其妻已死矣歸至家妻在問之曰昨夜夢有六七人遍令飲酒各請歌飲次有發瓦來中奴額驚覺尚頭痛因知昨夜所見

乃妻
夢也

歎衰草絡緯聲切切良人一去不復還今夕坐愁鬢如

霜

為長鬚
人歌

勸君酒君莫辭落花徒繞枝流水無返期莫恃少年時

少年能幾時

為白面
少年歌

怨空閨秋日亦難暮夫婿斷音書遙天鴈空度

為紫衣
人歌

切切夕風急露滋庭草濕良人去不回焉知掩閨泣

為黑

衣胡

人歌

螢火穿白楊悲風入荒草疑是夢中遊愁迷故園道

為綠

衣少年歌

花前始相見花下又相送何必言夢中人生盡如夢

長鬚

人歌答

張氏女

夢王尚書口授吟

會昌初安西市張氏有女國色晝夢至一大宅幙次女輩

十許人同妝飾候紫綬天官來為吏部沈公俄呼尚書來為并帥王公羣女進樂侍酒并州尤屬意張口授之吟謂曰歸辭父母異日復來驚寤泣曰尚書命我矣殆將死乎因卧病累日起

膏沐龍妝拜
父母而卒

鬟梳鬧掃學宮妝
獨立閑庭納夜涼
手把玉簪敲砌竹
清歌一曲月如霜

病狂人

歌

周顯德中齊州有人病狂每歌云云自言夢見一紅衣女子引入宮殿皆紅一小姑令歌

如此有道士曰此犯大麥毒所致女即心神小姑脾神也醫經蘿蔔治麩毒如此言以藥并蘿蔔食

遂愈

踏陽春人間三月雨
和塵陽春踏秋風起
腸斷人間白

髮人

五靈華曉玲瓏天府由來汝府中惆悵此情言不盡一
丸蘿蔔火吾宮

陳季卿

陳季卿江南人辭家十年舉進士無成羈棲輦下常訪
青龍寺僧不值時有終南山翁亦伺僧歸揖季卿同坐
適東壁有寰瀛圖季卿乃尋江南路因長嘆曰安得自
渭泛於河遊於洛渡淮濟江而達於家亦不悔無成而

歸翁笑曰此不難致乃命僧童折一竹葉作舟置圖中
渭水上曰公但注目此舟則如公所願耳然至家慎勿
久留季卿熟視之覺渭水生波葉舟漸大席帆旣張恍
若登舟始自渭及河維舟至禪窟蘭若題詩於南楹明
日次潼關登崖題句於關門東普通院門凡所經歷一
如前願旬餘至家妻子兄弟拜迎於門側題江亭晚望
詩於書齋此夕謂妻曰吾試期近不可久留即當進擢
乃吟一章別其妻又別諸兄弟一更後復登舟而逝家

人慟哭謂其死矣復遵舊路至於渭濱寺宇宛然見山翁擁褐而坐季卿謝曰歸則歸矣得非夢乎翁曰不久當知各別去後月餘妻子來訪始知果歸作詩非夢也

題禪窟蘭若

霜鐘鳴時夕風急亂鴉又望寒林集此時輟擢悲且吟
獨向蓮華一峰立

題潼關普通院門

度關悲矢志萬緒亂心機下坂馬無力掃門雪滿衣計

謀多不就心口自相違已作羞歸計還勝羞不歸

江亭晚望題書齋

立向江亭滿目愁十年前事信悠悠田園已逐浮雲散
鄉里半隨逝水流川上莫逢諸釣叟浦邊難得舊沙鷗
不緣齒髮未遲暮吟對遠山堪白頭

別妻

月斜寒露白此夕去留心酒至添愁飲詩成和淚吟離
歌悽鳳管別鶴怨瑤琴明夜相思處秋風吹半衾

別兄弟

謀身非不早其奈命來遲
舊友皆霄漢此身猶路歧
北風微雪後晚景有雲時
惆悵清江上區區趁試期

周延翰

夢中句

南唐太子校書周延翰修服餌術夢神人示以書七言為句其末句云云延翰

以為必得丹砂之效甚喜後死葬於吳大帝陵側無妻子惟一婢名丹砂七字皆驗

紫髯之伴有丹砂

任玠

夢中和句

蜀人任玠字溫如晚寓寧州府宅一夕夢一山叟貽詩玠和之既覺自笑

日吾其死乎數

日不疾而卒

故國路遙歸去來

山叟

春風天遠望不盡

玠

杜牧

夢中語

杜牧於宰執求小儀不遂請小秋又不遂夢人語之云云後果得比部員外

辭春不及秋
昆脚與昏頭

胥偃

夢中詩

胥偃應舉時夢徐將軍斬下頭項作詩云云以為不祥明年徐爽榜第二人及

第

昔作樹頭花今為塚中骨

曾崇範妻

夢中語

南唐曾崇範其妻先許聘數人皆死後
夢人得語云此是汝夫果嫁於曾也

田頭有鹿跡田尾著日炙

張孜


紀夢句

處士張孜寫李白真度禱忽夢白自
天降與語詩因為歌以紀之其畧曰

上天知我憶其人使向人間夢中見



御定全唐詩卷八百六十八



總校官庶吉士 臣 張能照

校對官中書 臣 張 頊

謄錄舉人 臣 汪志伊